

悲夫。悲夫。我生不辰。丁斯世。目擊時艱。殊憤憤。死不如生。生何樂。生不如死。死何怨。感懷及此。祝我者。何如。輓我壽云乎。哉。予乃爲君進一解。以慰之。曰。天演之定理。優勝而劣敗。中國占優勝。優勝於國粹。國粹存則中國存。國粹亡則中國亡。要惟吾儒之抱負。繫乎國粹之存亡者。存之是宜。自命而責諸人。曷禁搔首而問諸天。天之將喪斯文也。滔滔者誰與維持。殊不知伊於何底。天之未喪斯文也。挽既倒之狂瀾。作中流之砥柱。有志者宜若何抱殘守缺。保存國粹於過渡時期。予與君方期天假之年。則貞下起元之運會。且將拭目以俟之。慎毋存憤世意。作自輓詞。何竟因兒女輩稱觴祝嘏。不禁有感於懷而憮然曰。河清難俟。人壽幾何。

甲寅孟冬之月蒙老同鄉

程君朗巖以六十壽輓一篇見示。且索和予亦老矣。而志氣未衰。既有所感。遂信口占之。以爲和工拙在所不計也。

吳家鼎作於上海盛涇學校時年六十

大舞臺曲

鐵城鄭陶齋

世界競爭大舞臺。以優勝劣。霸圖恢。殖民捷效如英德。上下同心議院開。英德各省皆設議院憲法不行政難變。泰西新史論憲法未危言一書先已見。支那政事粉飾多。豆剖瓜分形早現。波蘭

自亡非俄亡。權奸僨事成參商。利權盡失若埃及。當道偏甘作虎狼。孰柯伐柯論殊矯。東討西征何日了。血戰紛紛滿地球。火烟酷烈人漸少。合久必分分必合。九天日月開闔闔。古今世運有循環。調元高臥羅浮楊。

### 春初庭前紅梅盛開作此紀之

何閔樵

春到南枝雪正融。聊將濃艷戲東風。仙姿畢竟超塵俗。纔吐英華便不同。富貴江南第一花。天香國色總堪誇。逋仙今也風流甚。買得胭脂付蕊華。紫檀作架玉爲盤。漫作清寒一例看。多謝春風好檣舉。故吹新艷上闌干。輭紅香裏寄閒身。姿態嫣然自可人。名士名花都一樣。恒從爛熳見天真。雪樣精神玉樣姿。笑裝穠艷學趨時。一簾春雨紅如滴。誤認桃花三五枝。最穠郁處最傳神。猶是當年潔白身。姑射仙人偶遊戲。嫣然一笑墮紅塵。

### 春夜聽雨

何閔樵

滴瀝來何處。聲入夢中寒。催春斷續冷。逼夜空濛濛。簾打珠鏘白。燈搖燄隱紅。明朝膏澤徧。額手預歌豐。

### 送馬天賓之秣陵